

醫學秘奧
五



慢驚灸法

以醬一匕塗在百會穴用艾圓如半粒黃豆大者灸五壯爲度五壯之內不拘次第嬰兒哭聲如平時無異者生其聲嘶不響亮者死累試累効百會穴在頭頂心旋毛中是穴凡嬰兒月內雖無驚病依法灸之能免一世之驚况泄瀉灸之亦妙

附錄蠱毒桃生毒

四端

福建諸州大抵皆有蠱毒而福之古田長溪爲最其種有四一曰地蠱二曰金蠶蠱三曰蜈蚣蠱四曰蝦蟆蠱皆能變化隱見不常皆有雌雄其交合皆

有定日近者數月遠者二年至期主家備禮迎降
設盆水於前雌雄遂入於水中交則毒浮其上
以針眼刺取必於是日毒一人蓋陰陽化生之氣
納諸人腹而托以乃育越宿則不能生故當日
至不暇恤宗親朋舊必施之凡飲食藥餌皆可入
獨不置熱羹中遇熱則消爛或無外人至則推本
家一人承之毒初入腹若無所覺積久則蠱生藉
人血氣以活益久則滋生長乃食五臟曉夕痛楚
不可忍惟啜百沸湯可暫息須臾甚則叫呼宛轉
爬刮床蓆臨絕之日眼耳鼻口涌出虫數百形狀

如一漬於水暴乾久而得水復活死者之屍雖火
化而心肺獨存殆若蜂窠淳熙中畜蠱之人事泄
呈之官檢其家得銀珂領子五色線環琰及小木
棋子兩面書五逆五順四字盛以七孔合又針兩
包各五十枚而十一無眼及大蜈蚣一條率非尋
常人家所用鞠訊其人乃云所謂順逆棋子者降
蠱之時所用以卜也得順者客當之逆者家當之
針之無眼者以眼盛藥既用則去之蓋所殺十一
人矣五色線凡蠱喜食綿不可得乃以此代其
銀珂領者欲嫁蠱移諸他處寘道旁冀見者取之

也凡中蠱毒無論年代遠近但煮一爲卯插銀釵
於內併含之約一食頃取視釵卯俱黑卽中其毒
也其方五倍子二兩硫黃末一錢甘草三寸一
炮出火毒一半生丁香木香麝香各等分輕粉
分糯米二十粒共八味入小沙瓶內水十分煎取
其七候藥面生皺皮用熟絹漚去滓通口服病人
平正仰臥令頭高覺腹間有物衝心者三卽不時
動若吐出以桶盛之如魚鰾之類乃是惡物吐罷
飲茶一盞瀉亦無妨旋煮白粥補忌生冷油膩酢
醬十日後服解毒丸三兩又經旬日可得平復



昔一顯官與泉州高僧西遊道由峽程其村舍皆能
畜蠱若就食必遭其毒無可柰何僧曰吾有神咒
可無憂也食至僧閉口持誦俄見小蜘蛛延緣齋
吻僧曰速殺之於是竟食無所損其咒曰姑蘇啄
磨耶啄吾知蠱毒生四角父是穹窿窮母是舍耶
女眷屬百千萬吾今悉知汝摩訶是時同行者競
傳之所至皆無恙更傳解毒方用荳豉七粒芭荳
去皮二粒入百草霜一處研細滴水研如菜荳大
以茅香湯送下七丸 又方 治金蠶毒纔覺中
毒先含白礬味甘而而不澁須嚼黑豆而不腥者是

也急取石榴根皮煎汁飲之卽吐出活虫無不立
愈又以白礬芽茶搗爲末冷水調服凡一切毒皆
可治

昔一人肋下忽腫起如生癰瘡狀頃間大如盃識者
云此桃生毒也候三更以棗荳嚼試若香甜卽是
已果然速搗川升麻爲細末以冷熱水調二錢速
服之遂瀉下真生葱數莖根鬚皆具其腫卽消續
煎平胃散調補且食白粥經旬始復常
有一書生中鷄肉桃生使商人善醫與藥服之頃吐
積肉一塊剖聞筋膜中有生肉存已成鷄形頭尾

嘴翅悉肖似凡食魚瓜果皆能用桃毒初中時覺
胞腹稍痛明日漸加攪刺滿十日則內物能動騰
土則胸痛沉下則腹痛積以瘦悴此其候也
膈則取之其法用熟茶一甌投膽礬半錢於中俟
凡化盡通口呷服良久以鷄翎探喉中卽吐出毒
物在下膈則瀉之以米飲下鬱金末二錢毒卽瀉
下乃礪人參白朮末各半兩同無灰酒半斤納瓶
內慢火熬半日許度酒熟取出溫服之每日一杯
五日乃止然後飲食如常此蠱毒桃生毒世人乃
極難治者予偶閱古書中得之專附錄於後以備

參考焉



黴瘡秘錄總說

黴瘡一症古未言及究其根源始于午會之末起自
嶺南之地至使蔓延通國流禍甚廣今當未會之
初人稟浸薄天厲時行交媾閉精氣相傳染一感
其毒酷烈匪常入髓淪肌流經走絡或中於陰或
中於陽或伏於內或見於外或攻臟腑或巡孔竅
有始終只在一經者有越經而傳者有間經而傳



者有毒伏本經者形症多端而治法各異卽如

毒中腎經始生下疳繼而骨痛瘡標耳內陰囊頭頂

背脊形如爛柿名曰陽徽瘡甚則毒傷陰陽二竅

傳於心發大瘡上下左右相對掣痛連心移於肝

眉髮脫落眼昏多淚或瘡爪甲毒伏本經作偏正

頭痛甚則目盲耳閉或生嗣不壽久則毒發囊穿

毒中肝經先發便毒嗣作筋疼瘡標耳項脇肋形如

砂仁俗以砂仁瘡名之甚則筋痿不起傳於脾四

肢發塊痛楚或蛀爛腿膝移於心生瘡如痣痛痒

交作毒伏本經大筋微疼久則毒發頸項兩膝



毒中脾經瘡標髮際口吻或堆肛門形如鼓釘俗以
廣痘名之甚則毒伏臟內傳於腎骨痛髓烈發塊
百會委中湧泉等穴移於肺肌膚生癰如花色紅
紫褪過卽成白癰毒伏本經發斑如丹久則毒結
腸胃

毒中肺經瘡標腋下胸膺面頰形如花朶俗以棉花
瘡名之甚則毒聚咽嗑傳於肝作筋疼遇月郭空
或天陰申酉時分作疹移於腎作腎臟風痛痒交
作毒伏本經生赤白癰久則毒結膺臆臂膊

毒中心經瘡標肩臂兩手紫黑酷似楊梅俗以楊梅

瘡名之甚則毒攻眸子傳於肺發喉癰漸蝕鼻梁
多作痰唾移於脾生鶩掌風癰手足起止不隨毒
伏本經十指流痛久則毒攻舌本或結毒小腸
是症也不獨交媾相傳稟薄之人或入市登園或與
患者接談偶中毒氣不拘老幼或卽病或不卽病
而慘痛週身或不作痛而傳於內室或內室無恙
而移患於子女甥孫者故備述受病根源施治本
末方法啓前人未發之秘病有經絡毒有淺深藥
有緩急察脉審症應攻應補毫不可紊毒未傳變
一臟見症者半月愈三臟見症者一月愈五臟俱

受病者五十日全愈此皆獨得之法已經印證
內名公妙在易生易褪疤不紫黑身無痛苦
不染生嗣無恙不伐胃氣元神誠千古不易
之聖藥也設或妄施汗下點擦薰洗等藥徒速
時効驗殊不知毒伏於內戕賊臟腑釀成已上諸
症以致投藥罔効余能刻日收功又能拔去輕粉
之毒使終身無患非若粗工之不經者此症直可
自任故爲是說以公之

癰瘡或問

或問曰癰瘡爲患何自而昉乎余曰嶺南之地卑濕

而暖霜雪不加蛇蟲不蟄諸凡汙穢蓄積於地遇
一陽來復濕毒與瘴氣相蒸物感之則癰爛易發
人感之則瘡瘍易侵更逢客火交煎重虛之人即
冒此疾故始謂之陽癰瘡云以致蔓延傳染所及
娼家有點過之說皆由氣運所使因漸而致也
或問癰瘡爲氣運所使有云廣瘡何也余曰廣瘡者
與痘相類痘瘡古所無有始生於北其氣自北而
南漢時謂之胡痘由先天之所中無論男女貴賤
遇歲火流行鼓腋而發若癰瘡者古亦無有始起
於南其氣自南而北今時謂之廣瘡由後天之所

感不問老幼愚智元稟虛怯者觸穢而染胡痘以地命名孰非氣運之所使乎

或問此症有謂楊梅瘡有謂棉花瘡有謂砂仁瘡有謂不一者何也余曰毒之相感者一氣也臟之見症者各異也如痘瘡有紅斑白癰如荳如藤如蚕子如土蛭如茱萸如葡萄或移毒眼目肘膝形症多端大約似荳者多半故名曰痘瘡如癰瘡有赤遊紫癰如瘋如疹如砂仁如棉花如鼓釘如爛柿如楊梅或結毒破爛孔竅名狀不一大約似楊梅者多半故名曰梅瘡痘瘡梅瘡皆以形命名所以

不一也

或問其瘡傳染不已何也余曰昔人染此症親戚同居飲食不同器置身靜室以俟愈故傳染邇來世薄人妄沉匿花柳者衆忽於避忌一犯毒之妓淫火交熾真元弱者毒氣乘虛而襲初不知覺或傳於妻妾或傳於姣童上世鮮有醫書可正故有傳染不已之患

或問老幼之人不近妓女突染此瘡竟有結毒者何也余曰不獨交媾鬪精或中患者毒氣薰蒸而成或祖父遺毒相傳此又非形接之比也

